

每週經課朗誦經文(巴克禮台語漢字)2013/01/01

共同經課 - 1 傳道書三章一節~十三節

1 起來啊，發出光！因為你的光已經到！耶和華的榮光發現，照佇你的頂面。2 看啊，黑暗欲蓋全地，黑黑暗暗遮蓋列國，總是耶和華欲發現照你，伊的榮光欲出現佇你的身上。3 列國欲來就近你的光；君王欲來就近你發現的大光。4 你抬目看四方；in攏聚集來你遮。你的眾子對遠遠來；你的眾查某子亦欲互人抱來。5 彼時，你看見就有榮光；你的心大印愕大開闊；因為大海豐盛的財物欲轉轉來歸你；列國的財寶亦欲來歸你。6 歸陣的駱駝，及米甸以及以法單陵的駱駝欲遍滿你的境內；示巴的眾人攏欲到；欲帶黃金乳香來，亦欲報傳耶和華的名聲。

共同經課 - 2 詩篇八篇

1 〔大衛的詩，交互樂官。用迦特的樂器。〕耶和華——阮的主啊，你的名佇全地到即高大！你將你的榮光排設佇天裡。2 你因為你的對敵的緣故，對嬰仔及食奶者的嘴，建立能力，欲互對敵及報冤者靜靜。3 我看你的天你的手所造的，及你所排列的月及星，4 世間人是甚麼，你數念伊？人的子是甚麼，你眷顧伊？5 你互伊比天使厘仔卡輪，閣賞賜伊榮光尊貴做冕旒。6 你設立伊管理你的手所造的，下萬物佇伊的腳下，7 就是一切的羊及牛，山野的走獸，8 天中的鳥、海內的魚，及見若經過海裡的路的，攏下佇伊的腳下。9 耶和華——阮的主啊，你的名佇全地到許高大！

共同經課 - 3 啟示錄二十一章一節~六 a 節

1 我閣看見有新的天新的地；因為前的天前的地已經過去，海也無閣有。2 閣看見聖城就是新的耶路撒冷，出佇天，對上帝降落，已經備辦便，親像新娘妝飾來聽候伊的丈夫。3 閣聽見大聲對座位出講：「上帝的會幕佇人的中間。上帝欲及in相及倚起，in欲做伊的百姓。上帝本身欲及in佇啲，來做in的上帝。4 閣欲給in的目調拭去攏總的目屎；無欲閣有死失，也無欲閣有哀傷、喉叫、痛疼，前的代誌已經過去。」5 坐佇座位的講：「我換新萬物！」閣講：「你著寫伊；因為諸個話是通信，是真實。」6 閣給我講：「已經成啦！我就是阿利法及奧美加；是起頭的，及路尾的。」

共同經課 - 4 馬太福音二十五章三十一節~四十六節

31 「當人子佇伊的榮光，及攏總的天使來的時，伊欲坐伊榮光的座位。32 聚集萬邦佇伊的面前。伊就欲分別in，親像牧者分別綿羊離開山羊，33 將綿羊下佇伊的正旁，山羊下佇伊的倒旁。34 彼時王欲給正旁的講：『恁對我的父得著恩典的，進前來承接國，就是對創造世間以來給恁備辦的；35 因為我枵，恁曾互我食，我嘴乾，恁互我飲；我出外，恁互我住；我褪腹裊，恁互我穿；36 我破病，恁看顧我；我佇監裡，你來尋我。』37 彼時義人欲應伊講：『主啊，阮甚麼時看見你枵，來互你食，嘴乾，來互你飲？38 甚麼時看見你出外，來互你住，褪腹裊，來互你穿？39 甚麼時看見你破病，抑是佇監裡，來尋你？』40 王欲應伊講：『我實在給恁講，恁既然行伊佇我的兄弟至微細的一個，就是行伊佇我。』41 閣欲給倒旁的講：『恁受咒詛的，著離開我！入永遠的火就是為著魔鬼及伊諸個使者所備辦的！42 因為我枵，恁未曾互我食，我嘴乾，恁未曾互我飲；43 我出外，恁未曾互我住；我褪腹裊，恁未曾互我穿；我破病，及佇監裡，恁未曾看顧我。』44 in亦欲應講：『主啊，阮甚麼時看見你枵，抑是嘴乾，抑是出外，抑是褪腹裊，抑是破病，抑是佇監裡，來無服事你啊？』45 伊就欲應伊講：『我實在給恁講，恁既然無行伊佇諸個至微細者的一個，就是無行伊佇我。』46 諸個人欲去入永遠的刑罰；若是義的人入永遠活。」